

दिनांक : 27.08.2026

समय : 18.45 बजे

आकाशवाणी जयपुर-अजमेर

प्रादेशिक समाचार

- प्रधानमंत्री नरेंद्र मोदी कह्यो-सरकार 21वीं सदी रा भारत मांय नुवा ज़माना री खेल व्यवस्था तैयार करणो तैय कीनो।
- प्रदेश मांय 309 नगर निकायां रा चुणाव सारू पर्चा दाखिल करण रो काम सरू व्ह्यो-पहला दिन 900 ऊँ बत्ता उम्मीदवार नाम पाना दाखिल कीना।
- उत्तर भारत रो नामी गोगामेड़ी मेळो काल सरू व्हेला।
- प्रदेश रा घणखर हलकां मांय काल ऊँ एक सप्ताह ताई बिरखा मंदी पड़बा रा आसार।

000

प्रधानमंत्री नरेंद्र मोदी कह्यो है के सरकार 21वीं सदी रा भारत मांय नुवा ज़माना री खेल व्यवस्था तैयार करणो तैय कीनो है। वे आज खेलो इंडिया संवाद कार्यक्रम मांय वीडियो कॉन्फ्रेंसिंग रे ज़रिये बोल रह्या हा। श्री मोदी कह्यो के खेल प्रतिभावां ने हर लेवल माथे मदद मुहैया करावण सारू ज़रूरी खेल तंत्र विकसित कर्यो जा रह्यो है। प्रधानमंत्री कह्यो के खेल केवल तमगा जीतण ताई सीमित नी है, बल्कि विकसित भारत बणावण मांय देश री खेल प्रतिभावां अर नौजवानां ने जोड़बा रो अभियान है। प्रधानमंत्री देश मांय खेलां रे बेहतर करियर अर पेशा रा तौर ऊँ सामी आवण माथे खुशी जतायी। श्री मोदी कह्यो के खेल चैंपियन बणबा सागे बेहतर प्रतियोगी बणबो ई सिखावे है।

.....

ई मौके युवा मामलात् अर खेल मंत्री मनसुख मांडविया कह्यो के देश रो खेल तंत्र अब केवल बुनियादी ढांचा अर तमगां ताई सीमित नी है। वे कह्यो के फिट इंडिया मूवमेंट अर संडे ऑन साइकिल सरीखा जतन जनता ने फिटनेस ने रोजमर्रा रो हिस्सो बणावण री सीख देवे है।

.....

राष्ट्रीय खेल दिवस 2026 रा सिलसिला मांय **मेरा युवा भारत-माय भारत** री ओर ऊँ आखा देश मांय राख्यी ज्या ई कार्यक्रम मांय राज्यां अर केन्द्र रा राज वाळा प्रदेशां रा हर जिला रा दो-दो कॉलेजां रा नौजवान शामिल व्ह्या। मुख्यमंत्री भजनलाल शर्मा जयपुर रा एक गैर सरकारी कॉलेज ऊँ वीडियो कॉन्फ्रेंसिंग रे ज़रिये ई कार्यक्रम ऊँ जुड़्या। ई मौके वे कह्यो के नौजवान भारत री सब ऊँ मोटी पूंजी है। नौजवानां रा धीरज, खुद माथे भरोसा अर लगातार मेहनत ऊँ ई विकसित भारत बणावण रो संकल्प सांचो कर्यो जा सके है। प्रदेश रा नौजवानां ने ई **खेलो इंडिया संवाद** रे ज़रिये खेलां ऊँ जुड़ी योजनावां ऊँ सीधा जुड़बा अर विचार राखण रो मौको मिल्यो। अजमेर मांय व्ह्या कार्यक्रम रे दौरान नौजवान खिलाड़ी वां री बात रखी।

.....

000

प्रदेश मांय 309 नगरीय निकाय चुनाव सारु आज अधिसूचना जारी व्हेवण सागे ई पर्चा दाखिल करण रो काम सुरु व्हे ग्यो। पहला दिन **900 ऊँ बत्ता** उम्मीदवार नामपाना दाखिल कीना। जयपुर नगर निगम सारु 10 उम्मीदवार नामपाना भर्या। डीग नगर परिषद मांय 34 जद के धौलपुर जिला री बाडी नगर पालिका मांय 35 उम्मीदवार पर्चा दाखिल कीना। राज्य निर्वाचन आयोग रे मुजब 9 अर 11 सितम्बर ने व्हेवण वाळा स्थानीय निकाय चुनाव सारु पर्चा 31 अगस्त ताई दाखिल कर्या जावेला। राखी अर दीतवार री छुट्टी रे कारण काल अर 30 अगस्त ने पर्चा दाखिल नी कर्या जा सकेला। दाखिल करी ज्या नामपानां री 1 सितम्बर ने जांच करी जावेला। नाम 3 सितम्बर ताई पाछा लिया जा सकेला। 4 सितम्बर ने चुनाव चिन्ह जारी कर्या जावेला। 14 सितम्बर ने वोटों री गिणती करी जावेला। ई बीच नगर निकाय चुनाव री गहमागहमी बधबा लाग्यी है। पार्षद ओहदा सारु स्थानीय सक्रियता, जीत री संभावना अर कार्यकर्तावां री राय रा आधार ऊँ उम्मीदवारां रा नामां माथे विचार कर्यो जा रह्यो है। भारतीय जनता पार्टी अर कांग्रेस रे अलावा केई ठौड़ा दूजा उम्मीदवार ई मुकाबला रोमांचक बणा रह्या है। भारत आदिवासी पार्टी—बाप, राष्ट्रीय लोकतांत्रिक पार्टी—आरएलपी, बहुजन समाज पार्टी— बीएसपी, आम आदमी पार्टी—आप अर राष्ट्रीय लोकदल— आरएलडी री ई आप—आप रा असर वाळा हलकां मांय सक्रियता सुरु व्हे ग्यी है।

000

नई दिल्ली मांय 12 अर 13 सितम्बर ने 18 वों ब्रिक्स शिखर सम्मेलन राख्यो जावेला। इण मांय ब्रिक्स रा सदस्य अर भागीदार देशां रा नेता अर न्युत्योड़ा नुमाइन्दा शामिल व्हेला। भारत री सदरत मांय व्हेवण वाळा ई ब्रिक्स शिखर सम्मेलन रो मुद्दो **लचीलापन, नवाचार, सहयोग और स्थिरता के लिए निर्माण** है। ई दौरान ब्रिक्स देशां बीच सहयोग मजबूत करण रा बारा मांय विचार कर्यो जावेला। भारत री सदरत मांय ई साल देश मांय 25 ऊँ बत्ता शहरां मांय 350 ऊँ बत्ती मीटिंग राख्यी ज्यी। भारत ब्रिक्स संगठन री सुरुआत करण वाळा देशां मांय शामिल है अर साल 2012, 2016 अर 2021 मांय ई इण री सदरत कर चुक्यो है।

000

आपसी प्रेम रो प्रतीक उत्तर भारत रो नामी गोगामेड़ी मेळो काल हनुमानगढ मांय सुरु व्हेला। लोकदेवता गोगाजी री याद मांय भरण वाळा ई सालाना मेळा मांय मोटी तादाद मांय जातरु शामिल व्हे है। म्हाणी हनुमानगढ खबरनवीस बतायो के मेळा सारु मोटा पैमाना माथे तैयारियां करी ज्यी है।

.....

000

भाई—बहन रा प्रेम रो पर्व राखी काल मणायो जावेला। सावणी पूण्यु रे मौके मनायी जावण वाळी राखी ने ध्यान राखता थकां बाजारां मांय रंग— बिरंगी राखियां सागे पूजन सामग्री, मिठाई, श्रीफल अर मेवां री खरीदी करी जा रही है। फ्रेंसी राखियां सागे सोना—चांदी सरीखी अर भांत—भांत रा कार्टून वाळी राखियां री ई खूब मांग है। राखी रे मौके सलूमबर अर श्रीगंगानगर जिलां समेत केई ठौड़ां **रक्षा का वचन** कार्यक्रम राख्यी ज्यो। महिलावां री हिफाजत ने समर्पित ई कार्यक्रम मांय महिलावां रा हक अर साइबर हिफाजत रा बारा मांय जाणकारी दीरीजी। राजसमंद जिला रा कांकरोली मांय रक्षाबंधन रा सिलसिला मांय पुलिस हेलमेट बांटण रो खास अभियान चलायो। श्रीगंगानगर जिला री सरकारी अर गैर—सरकारी स्कूलां मांय छात्रावां नशो नी करण री राखी बांध र छात्रां ने नशो नी करण रो संकल्प दिरायो। मतदाता जागरूकता रा संदेश वाळी राखियां ई लोगां ने खूब लुभा रही है। बाड़मेर जिला मांय पाकिस्तान ऊँ लाग्योड़ी सरहद माथे तैनात बी.एस.एफ. रा जवानां मांय ई राखी रो उमाव निजर आ रह्यो है। राज्यपाल हरिभाऊ बागडे राखी री बधाई अर शुभकामनावां दीनी है।

वे प्रेम अर विश्वास रा बंधन मांय जुड़बा रो संकल्प लेवण री अरजी कीनी। विधानसभा अध्यक्ष वासुदेव देवनानी ई जनता ने राखी री बधाई अर शुभकामनावां दीनी है। वां रा संदेश मांय देवनानी कह्यो के ओ पर्व भाई—बहन रा प्रेम, भरोसा अर संकल्प रो पर्व है।

000

काल सावण री पुण्यू रे दिन विश्व संस्कृत दिवस मणायो जावेला। ओ संस्कृत भाषा ने बधावो देवण अर इण री समृद्ध विरासत ने हेर र राखण री कोशिशं ऊँ जुड़यो है। संस्कृत दिवस री पैली वाळी सिंज्यां आज रात 08 बज्यां प्रदेश मांय आकाशवाणी रा सगळा केन्द्रां ऊँ राज्यपाल हरिभाऊ बागडे रो शुभकामना संदेश प्रसारित कर्यो जावेला। संस्कृत भाषा घणी जूनी व्हेवण सागे साहित्य, दर्शन, कला अर बौद्धिक परम्परावां ऊँ गहरो जुड़ाव राखे है। जयपुर रा जगद्गुरु रामानंदाचार्य राजस्थान संस्कृत विश्वविद्यालय रा प्रोफेसर कौसलेन्द्रदास कह्यो के संस्कृत भाषा देश री सभ्यता अर इतिहास रो प्रतीक है अर संस्कृत दिवस भाषा, साहित्य अर सांस्कृतिक विरासत रो जश्न मणावे है।

.....

000

राज्य मांय आवता एक सप्ताह रे दौरान बिरखा मांय कमी रा आसार है। 4 सितम्बर रे आरे-सारे राज्य रा ऊगणी हलकां मांय कटे-कटे बिरखा ओजू तेज व्हेवण री संभावना है। चौमासा री ई रूत मांय हाल ताई सामान्य ऊँ करीब 15 फीसदी कम बारिश व्ही है। जल संसाधन विभाग रे मुजब डीग, भरतपुर, बीकानेर अर फलौदी मांय चोखो मेह बरस्यो। अजमेर, अलवर कोटा अर जोधपुर समेत 22 जिलां मांय सामान्य जद के जयपुर, सवाईमाधोपुर, उदयपुर अर जैसलमेर समेत 15 जिलां मांय सामान्य ऊँ कम पाणी बरस्यो। प्रदेश रा छोटा-मोटा 693 बंधां मांय ऊँ 439 थोड़ा-घणा भर्या है, जद के 53 बंधा पूरा भर गया है।

000

प्रदेश मांय बदलता मौसम बीचे वायरल बुखार रा मामला तेजी ऊँ बध रह्या है। जयपुर रा डॉक्टर आर के जैन बतायो के एच-1 एन-1 एन्फ्लूएंजा रा लक्षण ई सामान्य बुखार ऊँ मिलता-जुलता व्हे है। इण रा असर ऊँ सर्दी, खांसी, जुकाम अर बुखार व्हे सके है। डॉ. जैन दो-तीन दिन मांय ठीक नी व्हेवण री सूरत मांय मर्जी ऊँ दवाई लेवण री बजाए डॉक्टर री राय लेवण री अरज कीनी।

एस बी-डॉ. आर के जैन

000

प्रधानमंत्री नरेन्द्र मोदी 30 अगस्त दीतवार ने आकाशवाणी ऊँ प्रसारित कर्या जावण वाळा खास कार्यक्रम "मन की बात" मांय विचार बतावेला। आ हर महीना प्रसारित कर्या जावण वाळा ई कार्यक्रम री 137वीं कड़ी व्हेला। ई सारु आप ई 28 अगस्त ताई मुफ्त नम्बर 1800-11-7800 माथे राय भेज सको हो। नरेन्द्र मोदी एप अर माय जीओवी ओपन फोरम रे जरिए ई विचार भेज्या जा सके है।

00